

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPŠTINSKI SUD U SARAJEVU
Broj: 65 0 Ip 1139111 24 Ip
Sarajevo, 22.05.2026. godine

Općinski sud u Sarajevu, sudija Nenad Banduka, u pravnoj stvari tražioca izvršenja KJP „ZOI 84“ – OLIMPIJSKI CENTAR D.O.O. SARAJEVO, ul. Alipašina b.b., Sarajevo, zastupan po punomoćniku Svjetlana Kuić, advokat iz Sarajeva, protiv izvršenika „7B“ D.O.O. SARAJEVO, ul. Alipašina b.b., Sarajevo, van ročišta, dana 22.05.2026. godine, donio je sljedeći:

ZAKLJUČAK

1. **ODREĐUJE SE ročište za DRUGU javnu prodaju pokretnih stvari na dan, PONEDELJAK 29.06.2026. godine sa početkom u 10,00 sati, i to;**

- Namjenski kontejner bijele boje sa ugrađenim strujomjerom i aparatom za sitan novac – procijenjene vrijednosti 3.000,00 KM;
- Aparat za razmjenu novca – procijenjene vrijednosti 3.000,00 KM;
- Aparat za miris – procijenjene vrijednosti 500,00 KM;
- Aparat za usisavanje sa elektromotorom – procijenjene vrijednosti 1.000,00 KM;
- Sudoper namjenski od inoxa (mali) – procijenjene vrijednosti 100,00 KM;
- Aparat za nanošenje sjaja za gume – procijenjene vrijednosti 1.000,00 KM;
- Kompletna pocinčana lučna konstrukcija predviđena za tri mjesta – procijenjene vrijednosti 8.000,00 KM;
- Pumpa za pritisak vode (3 komada) – procijenjene vrijednosti 1.000,00 KM;
- Namjenski paneli (13 komada) – procijenjene vrijednosti 500,00 KM;
- Aparat za naplatu (neispravan) – procijenjene vrijednosti 450,00 KM;
- Elektroormar sa svim osiguračima marke Siemens – procijenjene vrijednosti 1.000,00 KM;
- Kondenzator vode (polovan) – procijenjene vrijednosti 2.000,00 KM;
- Filter za omekšavanje vode (2 boce) – procijenjene vrijednosti 500,00 KM;
- Mali kompresor (zrak) – procijenjene vrijednosti 50,00 KM;
- Rezervoar za vodu (1.000 l) – procijenjene vrijednosti 50,00 KM;
- Pištolj za vodu sa crijevima (3 komada) – procijenjene vrijednosti 200,00 KM.

Javno nadmetanje održat će se u prostorijama Općinskog suda u Sarajevu, ul. Šenoina br. 1, kancelarija broj 454/IV – SLUŽBA SUDSKIH IZVRŠITELJA.

2. Konstatuje se da je Sudski izvršni organ dan 23.01.2026. godine, obavio pljenidbu pokretnih stvari iz tačke 1. ovog zaključka, o čemu je sastavljen pljenidbeni popis, te su iste ostavljene na čuvanje izvršeniku uz zabranu za dalje raspolaganje, o čemu je sastavljen Zapisnik broj gornji od 23.01.2026. godine.
3. Konstatuje se da je vrijednost pokretnih stvari opisanih u tački 1. ovog zaključka procijenjena od strane sudskog izvršitelja, a na koju procjenu tražilac izvršenja nije imao primjedbi.

4. Sud će u smislu člana 77. ZIP-a, a u vezi sa članom 135. ZIP-a zaključkom na zahtjev zainteresovanog lica omogućiti razgledanje zaplijenjenih pokretnih stvari, te istim odrediti način i vrijeme razgledanja uz prisustvo sudskog izvršitelja, a koji zahtjev mora biti podnesen u pismenoj formi 8 dana prije održavanja ročišta.
5. **Na drugom ročištu za javno nadmetanje pokretne stvari se neće prodavati za manje od jedne trećine vrijednosti navedene u tački 1. ovog zaključka. Početna ponuda na drugom ročištu ne može biti manja od jedne trećine od utvrđene vrijednosti koja je navedena u tački 1. ovog zaključka.**
6. Sud će obustaviti postupak ako se stvari ne uspije prodati ni na drugom ročištu za javno nadmetanje.
7. Učesnici javnog nadmetanja su dužni prije početka ročišta položiti osiguranje na depozitni račun ovog suda kod BBI BANKE na broj računa 1411965320009639 u visini od 10% od procijenjene vrijednosti, s tim što ne može iznositi više od 10.000,00 KM, te prije početka nadmetanja sudu predati primjerak uplatnice iz koje je vidljivo da je osiguranje položeno. Ponuđačima čija ponuda nije prihvaćena osim za tri najbolja ponuđača, vratit će se osiguranje odmah nakon zaključivanja javnog nadmetanja. Od polaganja osiguranja oslobođen je tražilac izvršenja i druge osobe određene Zakonom o izvršnom postupku.
8. Najbolji ponuđač – kupac je dužan da kupoprodajnu cijenu, po kojoj je pokretna stvar prodana, položi sudu u roku koji mu sud odredi, računajući od dana prodaje. Ako kupac u tom roku ne položi cijenu prodaja će se proglasiti nevaljanom i novim zaključkom će se odrediti da je pokretna stvar prodana drugom po redu najpovoljnijem ponuđaču, i tako redom, koji treba po prijemu tog zaključka sudu deponovati prodajnu cijenu u roku koji mu sud odredi.
9. Ako najbolji ponuđači u ostavljenim rokovima ne polože prodajnu cijenu, sud će oglasiti da je prodaja neuspjela. Ova pravila se primjenjuju i u slučaju odustanka trećeg ponuđača.
10. Poreze i takse u vezi sa prodajom pokretne stvari snosi kupac ukoliko se stranke drugačije nisu dogovorile.
11. Ovaj zaključak objavit će se na oglasnoj ploči suda.
12. Stranka može o svom trošku objaviti zaključak o prodaji u sredstvima javnog informisanja, odnosno da o zaključku obavijesti lica koja se bave posredovanjem u prodaji.

SUDIJA
Nenad Banduka

PRAVNA POUKA: Protiv ovog zaključka ne može se izjaviti žalba ni prigovor.